

Naalagiarnermi ileqqorisassat, ritualit, tussiutit aamma tussiutinut tapit akuersissutigineqartarneri pillugit Namminersorlutik Oqartussat nalunaarutaat nr. 6, 1. april 2016-imeersoq

Ilageeqarneq pillugu Inatsisartut inatsisaat nr. 9, 19. maj 2010-imeersumi § 4, imm 2 Inatsisartut inatsisaannit nr. 2, 29. november 2013-imi allanngortinneqartumit biskoppimillu inassutigineqartumik aalajangersarneqarpoq:

§ 1. Ilageeqarnermut Naalakkersuisoq Biskoppip tamanna pillugu innersuussuteqarneratigut naalagiarnermi ileqqorisassanik, ritualinik, tussiutinik tussiutinullu tapinik akuersissuteqarsinnaavoq.

Imm. 2. Biskoppi naalagiarnermi ileqqorisassanut, ritualinut, tussiutinut tussiutillu tapiinut ataatsikkut arlariisillugit atorineqartassanut najoqqutassanik aalajangersaasinnaavoq.

§ 2. Akuersissuteqarnermi Ilaageeqarnermut Naalakkersuisup ukua naammassineqarsimaneri qulakkiissavai:

- 1) Akuersissutigineqartussatut kissaatigisat kalaallisut aamma danskisut piussasut.
- 2) Naalagiarnermi ileqqorisassat, ritualit, tussiutit tussiutillu tapiisa pilerneru, Biskoppip najoqqutassatut aalajangersagai malillugit oqaluffimmi sulisunik ilagiinnillu peqataatitsinikkut pissasut.
- 3) Naalagiarnermi ileqqorisassani rituaalinilu uku taaneqassapput:
 - a) naalagiarnermi ileqqorisassat ritualilluunniit oqaluffimmi susoqarneratigut atorineqartassanersut.
 - b) sumi qaqugukkullu naalagiarnermi ileqqorisassat ritualilluunniit atorineqarsinnaanersut.
 - c) naalagiarnermi ileqqorisassat ritualilluunniit sukutsitai pinngitsooratik malitassanersut suullu ilitsersuutaanersut.
 - d) iliuitsit suut naalagiarnermi ileqqorisassanut atatillugu ingerlanneqartassanersut qaqugukkullu tamanna pissanersoq.
 - e) allakkat sorliit naalagiarnermi ileqqorisassani ritualiniluunniit ilaatinneqassanersut.
- 4) Tussiutit tussiutinik katersat saniatigut ukuninnga imaqaassapput:
 - a) Martin Lutherip Katekismusianit tigulaakkat.
 - b) naalagiartitseriaaseq akuerisaasoq (alterbogi) ritualillu akuerisaasut.

§ 3. Naalagiarnermi ileqqorisassat, ritualit, tussiutit tussiutillu tapii akuerisaasut Kalaallit Nunaanni Ilagiit nittartagaanni Biskoppimik aqunneqartumi ataatsimoortillugit saqqummiunneqassapput.

Imm. 2. Biskoppip oqaluffiup sulisuinik ilagiinnillu peqataatitsinissamut najoqqutassiai aamma Kalaallit Nunaanni Ilagiit nittartagaanni saqqummiunneqassapput.

§ 4. Nalunaarut 1. april 2016 atuutilersinneqassaaq.

Namminersorlutik Oqartussat ulloq 31. marts 2016

Nivi Olsen

/

Mikael Kristensen